



Sarinera Zernez - provisorii biologia - sböz permiss excepziunal ANU

La suprastanza ha approvà il sböz dal permiss excepziunal cha l'Uffizi da natüra ed ambiaint dal Grischun voul conceder al Cumün da Zernez per proseguir culla biologia fin cha la sarinera da Zernez es sanada. Il permiss excepziunal düra fin la fin da l'on 2024 e cuntegna diversas pretaisas.

KW Sarsura - contrat da concessiun OESS SA - approvaziun

Davo l'approvaziun da la radunanza cumünala dals 26-11-2020 da la dumonda fundamentala per realisar il proget d'un'ouvra electrica illa Val Sarsura tras l'Ouvra Electrica Susasca Susch SA han ils responsabels preparà il contrat da concessiun. Tal es gnü approvà da la suprastanza cumünala.

Signalisaziun Via Engiadina

La Via Engiadina es üna sporta turistica fich dumandada e bain frequentada però na amo signalisada tras tuot la val. La suprastanza cumünala ha deliberà ün credit supplementar per pudair optimar e signalisar il trajet da la Via Engiadina.

Signalisaziun access Susch, Surpunt

Il trafic in Surpunt, Susch s'ha augmantà bainquant daspö cha'l Muzeum ha drivi sias portas. Per evader la situaziun extraordinaria in Surpunt ha la suprastanza cumünala decis da montar ün scumond pels veiculs a motor cun excepziun d'ün servezzan d'apport, incl. forestal, agricultura avant la punt vers Surpunt ed ün scumond da parcar a la fin da la via da Surpunt.

Planisaziun da quartier Muglinè - facturaziun da cuosts d'infrastructura

La planisaziun da quartier Muglinè ha davo bod nouv ons pudü gnir serrada giö cun success. Ils cuosts d'infrastructura sun uossa cuntschaints ed han da gnir inchaschats tenor las prescripziuns da quartier pro'ls possessurs da las parcelas pertoccas seguond üna clav da scumpart. La suprastanza cumünala ha decretà il sböz da la facturaziun da cuosts.

Planisaziun d'areal Cul - surdatta d'incumbenza

Per chattar üna soluziun per l'access da la via vers Cul da la via chantunala s'haja surdat l'incumbenza pel stüdi da variantas al büro da planisaziun ed indschegner ewp AG a Cuaira.

Sanaziun ed ingrondimaint chasa da scoula Zernez - deliberaziun dal preventiv surlavurà

Culla sanaziun da la chasa da scoula sto eir gnir sanada la rampa d'access a la chasa da scoula. La suprastanza cumünala ha decis da refer la rampa complettamaing nouv. Ils cuosts da la rampa nu d'eiran resguardats i'l preventiv, uschè cha tal es gnü surlavurà e deliberà da la suprastanza cumünala.

Ordinaziun da taxas - adattamaints 1-1-2021 - decisiun

La suprastanza cumünala ha adattà in seguit a la votaziun a l'urna dals 27 settember 2020 l'ordinaziun da taxas cumünalas e tut sü ils müdamaints fats illas ledschas. Las novas tariffas valan a partir dals 1. schner 2021.

Controlla da l'organisaziun cumünala

Per gnir a savair scha l'organisaziun cumünala correspuonda ils dovairs actuals ha la suprastanza decis d'ingaschar ad üna firma externa per far üna controlla sur tuot las structurats e da l'organisaziun. L'incumbenza es gnüda surdatta a la firma Steinmann & Partner.

Termins 2021 per DO, SC e RC

L'agenda da termins 2021 es gnüda approvada. Dürant il 2021 as fa quint cun quatter radunanzas cumünalas, 19 sezzüdas da la suprastanza cumünala e cun 29 sezzüdas da la direenziun operativa. Implü sun gnüts fixats ils termins dals tavulins.